

T-12

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10 i 3/23), na prijedlog Ministarstva za rad, socijalnu politiku i izbjeglice, Vlada Zeničko-dobojskog kantona, na 17. sjednici, održanoj dana 16.02.2024. godine, d o n o s i

## ZAKLJUČAK

### I.

Utvrđuje se Prijedlog Zakona o mirovnom i arbitražnom vijeću.

### II.

Prijedlog Zakona iz tačke I. ovog zaključka, upućuje se u dalju skupštinsku proceduru po skraćenom postupku.

### III.

Zaključak stupa na snagu danom donošenja.

Broj: 02- 02 - 1095 /24  
Datum, 16.02.2024. godine  
Z e n i c a

#### DOSTAVLJENO:

1x Ministarstvo za rad, socijalnu politiku i izbjeglice,  
1x Stručna služba Skupštine,  
1x a/a.



**PREMIJER**

*Nezir Pivić*

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona na \_\_ sjednici održanoj dana \_\_.\_\_.2024. godine, d o n o s i

**ZAKON  
O MIROVNOM I ARBITRAŽNOM VIJEĆU**

**DIO PRVI - OSNOVNE ODREDBE**

**Član 1.  
(Predmet Zakona)**

Ovim zakonom uređuje se formiranje, nadležnost, sastav i način rada mirovnog i arbitražnog vijeća, i druga pitanja koja se odnose na rad vijeća, a od značaja su za mirno rješavanje radnih sporova na području Zeničko-dobojskog kantona (u daljem tekstu: Kanton).

**Član 2.  
(Definicije pojmova)**

Izrazi koji se koriste u ovom zakonu imaju značenje definisano Zakonom o mirnom rješavanju radnih sporova („Službene novine Federacije BiH“, broj: 49/21).

**Član 3.  
(Dobrovoljnost u mirnom rješavanju sporova)**

- (1) Strane u individualnom, odnosno kolektivnom sporu dobrovoljno odlučuju o mirnom rješavanju radnog spora, ako ovim ili drugim zakonom nije drugačije određeno.
- (2) Strane u individualnom, odnosno kolektivnom sporu same biraju miritelje i arbitre sa Liste miritelja i arbitara.

**DIO DRUGI – MIROVNO VIJEĆE**

**Član 4.  
(Formiranje Mirovnog vijeća)**

- (1) Mirovno vijeće se formira za područje Kantona.
- (2) Mirovno vijeće iz stava (1) ovog člana formira rješenjem ministar za rad, socijalnu politiku i izbjeglice (u daljem tekstu: ministar), u skladu sa ovim zakonom, u roku od dva dana od izbora miritelja iz člana 8. ovog zakona.
- (3) Protiv rješenja iz stava (2) ovog člana nije dozvoljena žalba, ali se može pokrenuti upravni spor.

**Član 5.**  
**(Nadležnost Mirovnog vijeća)**

Mirovno vijeće nadležno je za kolektivne radne sporove koji proizilaze iz kolektivnih ugovora zaključenih za područje Kantona, te za individualne i kolektivne radne sporove u kojima je jedna od strana poslodavac čije je sjedište na području Kantona.

**Član 6.**  
**(Sastav Mirovnog vijeća)**

Mirovno vijeće sastoji se od tri člana, po jednog predstavnika strana u individualnom, odnosno kolektivnom sporu, kao i jednog predstavnika - miritelja kojeg izaberu strane u sporu sa Liste koju utvrđuje u skladu sa ovim zakonom ministar, a koji obavlja poslove predsjednika mirovnog vijeća.

**Član 7.**  
**(Način rada Mirovnog vijeća)**

(1) Mirovno vijeće donosi Poslovnik o radu pred tim vijećem, kojima se uređuje djelokrug rada vijeća, prava i dužnosti članova, način rada, održavanje sjednica, postupak odlučivanja na sjednicama vijeća, rokovi obavještanja Ministarstva za rad, socijalnu politiku i izbjeglice (u daljem tekstu: Ministarstvo) o toku i okončanju postupka i druga pitanja vezana za njegov rad, ako ovim zakonom nije drugačije određeno.

(2) Administrativne poslove za mirovno vijeće vrši Ministarstvo.

(3) Postupak mirenja se u pravilu provodi u prostorijama Ministarstva, ili u drugim prostorijama koje odredi miritelj.

(4) Troškove za rad miritelja sa Liste koju utvrđuje ministar snosi Ministarstvo.

**Član 8.**  
**(Izbor miritelja za područje Kantona)**

(1) Izbor miritelja vrši se putem javnog poziva koji objavljuje Ministarstvo.

(2) Listu miritelja utvrđuje ministar u roku 15 dana od dana isteka roka od podnošenja prijave na javni poziv.

(3) Lista miritelja utvrđuje se na period od četiri godine i objavljuje se u "Službenim novinama Zeničko-dobojskog kantona".

**Član 9.**  
**(Lista miritelja)**

(1) Listu vodi Ministarstvo, a sadrži sljedeće podatke:

- a) ime, prezime i adresu miritelja,
- b) stručnu spremu,
- c) naziv i sjedište poslodavca miritelja ako je u radnom odnosu.

(2) Miritelj je dužan Ministarstvu prijaviti promjenu podataka iz stava (1) ovog člana u roku od tri dana od dana nastanka promjene.

**Član 10.**  
**(Obaveza obavještanja o toku i okončanju postupka)**

Miritelj je dužan da redovno obavještavaju Ministarstvo o toku i okončanju postupka mirnog rješavanja radnog spora, u skladu sa Poslovníkom o radu mirovnog vijeća iz člana 7. stav (1) ovog zakona.

**Član 11.**  
**(Pravo na naknadu)**

- (1) Miritelj ima pravo na naknadu za rad.
- (2) Miritelj je dužan po okončanju postupka mirenja podnijeti izvještaj ministru.
- (3) Visinu i uslove za ostvarivanje prava na naknadu iz stava (1) ovog člana utvrđuje ministar, u skladu sa važećim propisima.
- (4) Sredstva iz stava (1) ovog člana obezbjeđuju se u budžetu Kantona.

**DIO TREĆI – ARBITRAŽNO VIJEĆE**

**Član 12.**  
**(Formiranje Arbitražnog vijeća)**

- (1) Arbitražno vijeće se formira za područje Kantona.
- (2) Arbitražno vijeće iz stava (1) ovog člana formira rješenjem ministar, u skladu sa ovim zakonom, u roku od dva dana od izbora arbitra iz člana 16. ovog zakona.
- (3) Protiv rješenja iz stava (2) ovog člana nije dozvoljena žalba, ali se može pokrenuti upravni spor.

**Član 13.**  
**(Nadležnost Arbitražnog vijeća)**

Arbitražno vijeće nadležno je za rješavanje onih sporova koje strane u individualnom, odnosno kolektivnom sporu ne riješe u postupku mirenja, a sporazumno odluče da se rješavanje spora povjeri arbitražnom vijeću.

**Član 14.**  
**(Sastav Arbitražnog vijeća)**

Arbitražno vijeće sastoji se od tri člana, po jednog predstavnika strana u individualnom, odnosno kolektivnom sporu, kao i jednog predstavnika- arbitra kojeg izaberu strane u sporu sa Liste koju utvrđuje u skladu sa ovim zakonom ministar, a koji obavlja poslove predsjednika arbitražnog vijeća.

**Član 15.**  
**(Način rada Arbitražnog vijeća)**

- (1) Arbitražno vijeće donosi Poslovník o radu pred tim vijećem, kojima se uređuje djelokrug rada vijeća, prava i dužnosti članova, način rada, održavanje sjednica, postupak odlučivanja na sjednicama vijeća, rokovi obavještanja Ministarstva o toku i okončanju postupka i druga pitanja vezana za njegov rad, ukoliko ovim zakonom nije drugačije određeno.
- (2) Administrativne poslove za arbitražno vijeće vrši Ministarstvo.
- (3) Postupak arbitraže se u pravilu provodi u prostorijama Ministarstva, ili u drugim prostorijama koje odredi arbitar.

- (4) Troškove za rad arbitra kojeg imenuje ministar, a koji obavlja poslove predsjedavajućeg arbitražnog vijeća snosi Ministarstvo.

**Član 16.**  
**(Izbor arbitra za područje kantona)**

- (1) Izbor arbitra vrši se putem javnog poziva koji objavljuje Ministarstvo.  
(2) Listu arbitara utvrđuje ministar u roku 15 dana od dana isteka roka od podnošenja prijava na javni poziv.  
(3) Lista arbitara utvrđuje se na period od četiri godine i objavljuje se u “Službenim novinama Zeničko-dobojskog kantona”.

**Član 17.**  
**(Lista arbitara)**

- (1) Listu vodi Ministarstvo, a sadrži sljedeće podatke:  
a) ime, prezime i adresu arbitra,  
b) stručnu spremu,  
c) naziv i sjedište poslodavca arbitra ako je u radnom odnosu.  
(2) Arbitar je dužan Ministarstvu prijaviti promjenu podataka iz stava (1) ovog člana u roku od tri dana od dana nastanka promjene.

**Član 18.**  
**(Obaveza obavještanja o toku i okončanju postupka)**

Arbitar je dužan da redovno obavještava Ministarstvo o toku i okončanju postupka arbitraže, u skladu sa Poslovníkom o radu arbitražnog vijeća iz člana 15. stav (1) ovog zakona.

**Član 19.**  
**(Pravo na naknadu)**

- (1) Arbitar ima pravo na naknadu za rad.  
(2) Arbitar je dužan po okončanju postupka arbitraže podnijeti izvještaj ministru.  
(3) Visinu i uslove za ostvarivanje prava na naknadu iz stava (1) ovog člana utvrđuje ministar, u skladu sa važećim propisima.  
(4) Sredstva iz stava (1) ovog člana obezbjeđuju se u budžetu Kantona.

**DIO ČETVRTI- PRIJELAZNE I ZAVRŠNE ODREDBE**

**Član 20.**  
**(Nadzor nad primjenom zakona)**

- (1) Nadzor nad primjenom ovog zakona vrši Ministarstvo.  
(2) Inspeksijski nadzor nad primjenom ovog zakona vrši kantonalna inspekcija rada.

**Član 21.**  
**(Prestanak važenja odredaba Zakona o radu Zeničko-dobojskog kantona)**

Stupanjem na snagu ovog zakona stavlja se van snage DIO ČETVRTI- MIROVNO VIJEĆE Zakona o radu Zeničko-dobojskog kantona („Službene novine Zeničko-dobojskog kantona”, broj:1/17).

**Član 22.**  
**(Primjena Zakona o mirnom rješavanju radnih sporova)**

- (1) U postupcima mirenja i arbitraže koji se provode pred mirovnim i arbitražnim vijećem formiranim u skladu sa ovim zakonom, za pitanja koja nisu uređana ovim zakonom, primjenjivati će se odredbe Zakona o mirnom rješavanju radnih sporova.
- (2) Do donošenja liste miritelja i arbitara za područje Kantona, primjenjivat će se Lista formirana na osnovu federalnog propisa.

**Član 23.**  
**(Stupanje na snagu)**

Ovaj zakon stupa na snagu osmog dana od dana objavljivanja u „Službenim novinama Zeničko-dobojskog kantona”.

Broj: \_\_\_\_\_/24  
Datum, \_\_. \_\_. 2024. godine  
Z e n i c a

**Predsjedavajući Skupštine**

**Ćazim Huskić**

# **O B R A Z L O Ź E N J E**

## **ZAKONA**

### **O MIROVNOM I ARBITRAŽNOM VIJEĆU**

#### **I. PRAVNI OSNOV**

Pravni osnov za donošenje ovog zakona sadržan je u odredbama člana 37. stav (1) tačka f) Ustava Zeničko-dobojskog kantona, prema kojem je utvrđena nadležnost Skupštine kantona da donosi zakone i ostale propise za izvršavanje kantonalnih nadležnosti. Socijalna politika, koja obuhvata i uređivanje pitanja iz oblasti rada, je u nadležnosti Federacije BiH i kantona, kako je to i utvrđeno u članu 19. tačka e) Ustava Zeničko-dobojskog kantona.

#### **II. RAZLOZI ZA DONOŠENJE ZAKONA**

Federalnim Zakonom o mirnom rješavanju radnih sporova („Službenim novinama Federacije BiH“, broj: 49/21), a koji je stupio na snagu 01.07.2021.godine (u daljem tekstu: Federalni zakon) utvrđena je obaveza kantona da donesu propis kantona kojim će se regulisati pitanja koja su dodijeljena u nadležnost kantona.

Slijedom navedenog, Prijedlogom Zakona o mirovnom i arbitražnom vijeću Zeničko-dobojskog kantona obuhvaćena su sljedeća pitanja: formiranje, sastav, način rada i druga pitanja koja se odnose na rad mirovnog i arbitražnog vijeća za područje kantona.

Imajući u vidu da nije u pitanju složen i obiman zakon, kao i obavezu uređivanja određenih pitanja kantonalnim propisom, Ministarstvo za rad, socijalnu politiku i izbjeglice je stajališta da su ispunjeni uslovi iz člana 140. Poslovnika Skupštine Zeničko-dobojskog kantona – Treći prečišćeni tekst („Službene novine Zeničko-dobojskog kantona“, broj: 14/18, 18/18-isp., 7/19, 7/20 i 16/23) za donošenje zakona po skraćenom postupku, zbog čega se ovaj zakon podnosi Skupštini Zeničko-dobojskog kantona u formi prijedloga.

#### **III. NAČELA NA KOJIMA SE ZASNIVA ZAKON**

Prijedlog Zakona je zasnovan na programskim zadacima i ciljevima Vlade Zeničko-dobojskog kantona usmjerenim ka zakonskom uređenju predmetne oblasti zasnovane na principu dobrovoljnog odlučivanja o mirnom rješavanju radnog spora, strana u individualnom ili kolektivnom radnom sporu.

#### **IV. OBRAZLOŽENJE PREDLOŽENIH RJEŠENJA**

##### **DIO PRVI-OSNOVNE ODREDBE**

(Članovi 1. i 2. i 3.)

Definisana je predmet Zakona, definicije pomjova i utvrđen princip dobrovoljnosti u rješavanju radnih sporova. U okviru predmeta Zakona, propisuje se da se zakonom uređuje: formiranje mirovnog i arbitražnog vijeća, njihov sastav, način rada kao i druga pitanja koja se odnose na rad vijeća. Određeni izrazi koji se koriste u Zakonu, definisani su u članu 2. zakona, a u članu 3. utvrđena je dobrovoljnost kao osnovni princip pri rješavanju individualnih i kolektivnih radnih sporova.

##### **DIO DRUGI- MIROVNO VIJEĆE**

(Članovi od 4. do 11.)

Članom 4. definisan je način formiranja mirovnog vijeća za područje kantona. Članom 5. utvrđena je nadležnost mirovnog vijeća za područje kantona, a članom 6. regulisan je sastav mirovnog vijeća, kojim

je propisano da se mirovno vijeće sastoji od tri člana i to: po jednog predstavnika strana u sporu i jednog predstavnika kojeg izaberu strane u sporu sa Liste miritelja koju utvrđuje ministar.

U članu 7. utvrđen je način rada mirovnog vijeća, kojim je utvrđen djelokrug rada, prava i dužnosti članova, način rada i druga pitanja vezana za rad mirovnog vijeća. Ovim članom propisano je i da se administrativni poslovi za mirovno vijeće obavljaju u kantonalnom ministarstvu nadležnom za oblast rada. Također, utvrđeno je da troškove za rad miritelja snosi kantonalno ministarstvo. Članom 8. i 9. propisno je da se izbor miritelja za područje Zeničko-dobojskog kantona vrši putem javnog poziva koji objavljuje kantonalno ministarstvo, te utvrđivanje Listu miritelja za područje Zeničko-dobojskog kantona i način vođenja Liste. U članu 11. propisano je da pravo na naknadu za rad u mirovnom vijeću pripada miritelju, a da visinu i uslove za ostvarivanje naknade utvrđuje kantonalni ministar.

## **DIO TREĆI-ARBITRAŽNO VIJEĆE**

(Članovi od 12. do 19.)

Članom 12. definisan je način formiranja arbitražnog vijeća za područje kantona. Članom 13. utvrđena je nadležnost arbitražnog vijeća za područje kantona, a članom 14. regulisan je sastav arbitražnog vijeća, kojim je propisano da se arbitražno vijeće sastoji od tri člana i to: po jednog predstavnika strana u sporu i jednog predstavnika kojeg izaberu strane u sporu sa Liste arbitara koju utvrđuje ministar.

U članu 15. utvrđen je način rada arbitražnog vijeća, kojim je utvrđen djelokrug rada, prava i dužnosti članova, način rada i druga pitanja vezana za rad arbitražnog vijeća. Ovim članom propisano je i da se administrativni poslovi za arbitražno vijeće obavljaju u kantonalnom ministarstvu nadležnom za oblast rada. Također, utvrđeno je da troškove za rad arbitra snosi kantonalno ministarstvo. Članom 16. i 17. propisno je da se izbor arbitra za područje Zeničko-dobojskog kantona vrši putem javnog poziva koji objavljuje kantonalno ministarstvo, te utvrđivanje Listu arbitara za područje Zeničko-dobojskog kantona i način vođenja Liste. U članu 18. propisana je obaveza obavještanja ministarstva o toku i postupku arbitraže. Članom 19. propisano je da pravo na naknadu za rad u arbitražnom vijeću pripada arbitru, a da visinu i uslove za ostvarivanje naknade utvrđuje kantonalni ministar.

## **DIO ČETVRTI- PRIJELAZNE I ZAVRŠNE ODREDBE**

(Članovi od 20. do 23.)

U članu 20. propisano je da će nadzor nad primjenom ovog zakona vrši Ministarstvo, a inspekcijski nadzor kantonalna inspekcija rada. Članom 21. propisano je da stupanjem na snagu ovog zakona, stavlja se van snage DIO ČETVRTI- MIROVNO VIJEĆE Zakona o radu Zeničko-dobojskog kantona („Službene novine Zeničko-dobojskog kantona”, broj:1/17), koji se do donošenja ovog zakona primjenjivao na postupak mirenja i mirovno vijeće za područje Zeničko-dobojskog kantona. Članom 21. propisano je da će se u postupcima mirenja i arbitraže pred mirovnim i arbitražnim vijećem za područje Zeničko-dobojskog kantona na sva pitanja koja nisu uređana ovim zakonom, primjenjivati Zakon o mirnom rješavanju radnih sporova Federacije Bosne i Hercegovine, a u članu 22. je utvrđeno da ovaj zakon stupa na snagu osmog dana od dana objavljivanja u Službenim novinama Zeničko-dobojskog kantona.

## **V. – FINANSIJSKA SREDSTVA**

Za primjenu ovog zakona nisu potrebna dodatna finansijska sredstva iz Budžeta Zeničko-dobojskog kantona.



Broj: 07-02-18872-1/23  
Zenica, 25.01.2024. godine

408/24

11/24

**MINISTARSTVO ZA RAD, SOCIJALNU POLITIKU I IZBJEGLICE**

**PREDMET:** Mišljenje na Prijedlog Zakona o mirovnom i arbitražnom vijeću  
- dostavlja se

Ministarstvo finansija je razmotrilo Prijedlog Zakona o mirovnom i arbitražnom vijeću, koji je dostavljen na mišljenje uz akt Ministarstva za rad, socijalnu politiku i izbjeglice Zeničko-dobojskog kantona, broj: 09-02-18872-1/23 od 22.01.2024. godine, te u skladu sa članom 8. Pravilnika o proceduri izrade izjave o fiskalnoj procjeni zakona, drugih propisa i akata planiranja na budžet („Službene novine Federacije BiH“, broj: 34/16 i 15/18) i članom 31. stav (1) tačka c) Poslovnika o radu Vlade Zeničko-dobojskog kantona („Službene novine Zeničko-dobojskog kantona“, broj: 10/21), u pogledu finansijskih sredstava potrebnih za izvršenje ovog propisa, odnosno o fiskalnoj procjeni propisa, daje slijedeće

**MIŠLJENJE**

Članom 5. stav 2. Zakona o budžetima u Federaciji BiH („Službene novine FBiH“, broj: 102/13, 9/14, 13/14, 8/15, 91/15, 102/15, 104/16, 5/18, 11/19, 99/19 i 25a/22), propisano je da „propisi koji imaju finansijske posljedice na budžet moraju biti obrazloženi, odnosno opravdani analizom troškova i koristi“.

Članom 42. stav 1. Zakona o budžetima u Federaciji BiH, propisano je da „prijedlozi zakona, uredbi i drugih propisa koje Vlada donosi ili predlaže donošenje Parlamentu moraju sadržavati procjenu finansijskih efekata na budžet.“

Članom 21. stav 2. Zakona o organizaciji organa uprave u Federaciji BiH («Službene novine Federacije BiH», broj: 35/05), propisano je da „ako se za provođenje zakona ili drugog propisa koji se predlažu moraju osigurati određena finansijska sredstva, organi uprave obavezni su u obrazloženju tog propisa iskazati orijentacijski iznos finansijskih sredstava koja su potrebna za njegovo izvršavanje i odrediti izvore iz kojih treba osigurati ta sredstva.“

U tački V Obrazloženja Prijedloga Zakona o mirovnom i arbitražnom vijeću, navedeno je da za „primjenu ovog zakona nisu potrebna dodatna finansijska sredstva iz Budžeta Zeničko-dobojskog kantona“.

Također, u Izjavi o fiskalnoj procjeni – Obrazac IFP-NE od 22.01.2024. godine, navedeno je:

„U budžetu Ministarstva za rad, socijalnu politiku i izbjeglice Zeničko-dobojskog kantona se neće iziskivati dodatna finansijska sredstva za provođenje Zakona o mirovnom i arbitražnom vijeću u Zeničko-dobojskom kantonu s obzirom da se radi o zakonu koji uređuje pitanja iz oblasti radnih odnosa, odnosno uređuje se formiranje, nadležnost, sastav i način rada mirovnog i arbitražnog vijeća, i druga pitanja koja se odnose na rad vijeća, a od značaja su za mirno rješavanje radnih sporova na području Zeničko-dobojskog kantona, te su sredstva za eventualno formiranje i rad vijeća predviđena u Budžetu za 2024 godinu.“

Odredbama tačke 8. Uputstva o izvršavanju budžeta sa jedinstvenog računa trezora („Službene novine Federacije BiH“, broj: 34/16) i člana 58. stav (1) Zakona o izvršavanju Budžeta Zeničko-

dobojskog kantona za 2024. godinu („Službene novine Zeničko-dobojskog kantona“, broj: 21/23), propisano je: „Odgovornost za planiranje i stvaranje obaveza u okviru propisanog budžeta je isključivo na rukovodiocu budžetskog korisnika.“

Odredbama člana 25. stav (2) Poslovnika o radu Vlade Zeničko-dobojskog kantona („Službene novine Zeničko-dobojskog kantona“, broj: 10/21), propisano je:

„Predlagač materijala je odgovoran da prijedlog materijala koji se dostavlja radi razmatranja na sjednicama Vlade bude u skladu sa Ustavom, važećim zakonima i provedbenim propisima.“

S tim u vezi, Ministarstvo finansija ne snosi odgovornost za pravna rješenja predložena od strane obrađivača u dostavljenom Prijedlogu Zakona.

Imajući u vidu gore navedeno Obrazloženje Prijedloga Zakona i dostavljenu Izjavu o fiskalnoj procjeni, u kojima je navedeno da za primjenu Prijedloga Zakona „nisu potrebna dodatna finansijska sredstva iz Budžeta Zeničko-dobojskog kantona“, Ministarstvo finansija nema drugih primjedbi i sugestija iz svoje nadležnosti, s tim da je u slučaju eventualne potrebe za dodatnim sredstvima za provedbu navedenog Zakona, nedostajuća finansijska sredstva obavezno obezbijediti samo Ministarstvo za rad, socijalnu politiku i izbjeglice Zeničko-dobojskog kantona, kroz uštede ili unutrašnje preraspodjele sredstava.

S poštovanjem!

**Dostavljeno:**

1x Naslovu,  
1x a/a.



**MINISTRICA**

*Dženana Čišija*





Ministarstvo za rad, socijalnu politiku i  
izbjeglice  
n/r ministra  
-ovdje-

Zenica, 05.02.2024. godine  
Naš broj: 06-04/2-02-1604-1/24

**PREDMET: Prijedlog Zakona o mirovnom i arbitražnom vijeću Zeničko-dobojskog kantona za- mišljenje, dostavlja se**

Veza Vaš broj: 09-02-18872-2/23 od 22.01.2024. godine

U skladu sa članom 11. Zakona o kantonalnim ministarstvima i drugim tijelima kantonalne uprave („Službene novine Zeničko- dobojskog kantona“, broj 10/15 i 8/22), i članom 31. stav (1) tačka b) Poslovnika o radu Vlade Zeničko- dobojskog kantona („Službene novine Zeničko- dobojskog kantona“, broj: 10/21), te na osnovu uvida u tekst Prijedloga Zakona o mirovnom i arbitražnom vijeću Zeničko-dobojskog kantona (u daljem tekstu: Prijedlog Zakona) dostavljenom aktom veze, u postupku pravne analize Prijedloga Zakona, provedene s ciljem utvrđivanja usklađenosti iste sa:

- Europskom konvencijom o zaštiti ljudskih prava i sloboda i drugim pravima,
- Zakonom o prekršajima u Federaciji Bosne i Hercegovine („Službene novine Federacije Bosne i Hercegovine“, broj: 63/14),
- Zakonom o organizaciji organa uprave u Federaciji Bosne i Hercegovine („Službene novine Federacije Bosne i Hercegovine“, broj: 35/05),
- Zakonom o kantonalnim ministarstvima i drugim tijelima kantonalne uprave („Službene novine Zeničko- dobojskog kantona“, broj: 10/15 i 8/22), daje se

### **Mišljenje**

U postupku davanja mišljenja na dostavljeni akt broj i datum gornji, Ministarstvo za pravosuđe i upravu Zeničko-dobojskog kantona (u daljem tekstu: Ministarstvo), s aspekta svoje nadležnosti, nema primjedbi na dostavljeni Prijedlog Zakona.

Poštovanje,

Dostaviti:  
1 x Naslovu  
1 x a/a



**MINISTAR**

Nebojša Nikolić





Broj: 03-02-18872-4/23  
Zenica, 24.01.2024. godine

**MINISTARSTVO ZA RAD  
SOCIJALNU POLITIKU I IZBJEGLICE  
ZENIČKO-DOBOJSKOG KANTONA**

**PREDMET: Mišljenje o Prijedlogu Zakona o mirovnom i arbitražnom vijeću - dostavlja se**  
**- Veza Vaš akt broj: 09-02-18872-3/12 od 22.01.2024. godine -**

U skladu sa članom 2. Uredbe o Sekretarijatu za zakonodavstvo Vlade Zeničko-dobojskog kantona („Službene novine FBiH“, broj: 8/96 i „Službene novine Zeničko-dobojskog kantona“, broj: 2/05) i članom 31. stav (1) tačka a) Poslovnika o radu Vlade Zeničko-dobojskog kantona („Službene novine Zeničko-dobojskog kantona“, broj: 10/21), te na osnovu uvida u tekst Prijedloga Zakona o mirovnom i arbitražnom vijeću, u postupku koji se odnosi na utvrđivanje usklađenosti istog sa Ustavom, pravnim sistemom i metodološkim jedinstvom u izradi propisa dostavljamo vam slijedeće

**MIŠLJENJE**

Ustavni osnov za donošenje Prijedloga Zakona o mirovnom i arbitražnom vijeću (u daljem tekstu: Prijedlog zakona) je pravilno utvrđen.

Prijedlog zakona je usklađen sa Zakonom o mirnom rješavanju radnih sporova („Službene novine Federacije BiH“, broj: 49/21) i u nomotehničkom smislu je urađen u skladu sa Jedinstvenim pravilima za izradu pravnih propisa u Zeničko-dobojskom kantonu („Službene novine Zeničko-dobojskog kantona“, broj 5/08).

Shodno navedeno, stekli su se uvjeti za davanje mišljenja na osnovu člana 31. stav (1) tačka a) Poslovnika o radu Vlade Zeničko-dobojskog kantona („Službene novine Zeničko-dobojskog kantona“ broj: 10/21) te se Prijedlog zakona može razmatrati na jednoj od narednih sjednica Vlade Zeničko-dobojskog kantona.

Dostavljeno:  
1x Naslovu,  
1x a/a.



Bosna i Hercegovina, Zenica, Kučukovići br. 2  
Tel: 032/460-675; e-mail zakonodavstvo@zdk.ba



**SEKRETAR**

**Mirnes Burkić**

# OBRAZAC IZJAVA O FISKALNOJ PROCJENI

**Obrazac IFP NE**

**A 1. Obradivač propisa**

Razdjel	KOD	
	20010001	MINISTARSTVO ZA RAD, SOCIJALNU POLITIKU I IZBJEGLICE ZENIČKO-DOBOJSKOG KANTONA


**B 2. Osnovni podaci o prijedlogu propisa**

Vrsta propisa/akta	Zakon	DA	Odluka		
	Uredba	NE	Drugi akti	NE	Strategija
Naziv propisa/akta	ZAKON O MIROVNOM I ARBITRAŽNOM VIJEĆU - prijedlog			NE	Drugi akti planiranja
				NE	NE

**C 3. Izjava o nepostojanju dodatnih fiskalnih efekata predloženog propisa**

U budžetu Ministarstva za rad, socijalnu politiku i izbjeglice Zeničko-dobojskog kantona se neće iziskivati dodatna finansijska sredstva za provođenje Zakona o mirovnom i arbitražnom vijeću u Zeničko-dobojskom kantonu s obzirom da se radi o zakonu koji uređuje pitanja iz oblasti radnih odnosa, odnosno uređuje se formiranje, nadležnost, sastav i način rada mirovnog i arbitražnog vijeća, a od značaja su za mirno rješavanje radnih sporova na području Zeničko-dobojskog kantona, te sredstva za eventualno formiranje i rad mirovnog vijeća predviđena u Budžetu za 2024. godinu.

**D 4. Pečat i potpis odgovornog lica**



Ministar, Antonio Šimunović

*(Handwritten signature)*

Mjesto i datum

Zenica, 22.01.2024. godine